



Inatsisartunut ilaasortaq Naaja H. Nathanielsen, Inuit Ataqtigiit  
MAANI

**§ 37 naapertorlugu apeqquteqaammut nr. 2015-286-imut uranip saniatigooralugu tunisassiarineqartarneranut tunngasumut, akissuteqaat**

Uranip saniatigooralugu tunisassiarineqartarnera pillugu Inatsisartut suleriaasianni § 37, imm. 1 naapertorlugu, apeqqutit matuma kingulianiittut Naalakkersuisunut saqqummiuppatit, tassani apeqquteqaammut tunngavilersuutini allassimalluni Inatsisartut aalajangiineranni uranip pingaarnertut imaluunniit saniatigut tunisassiarineqartarnera immikkoortinneqanngitsoq.

9. december 2015  
Sagsnr. 2015-16221

Postboks 930  
3900 Nuuk  
Tlf. (+299) 34 68 00  
Fax (+299) 32 43 02  
E-mail: [mmr@nanaq.gl](mailto:mmr@nanaq.gl)  
[www.naalakkersuisut.gl](http://www.naalakkersuisut.gl)

**1. Urani pillugu aalajangiisoqarnerani Naalakkersuisut uppersaaqquneqarput urani pingaarnertut qallorneqarnissaa kiisalu saniatigooralugulu qallorneqarnissaa aalajangiinerimi immikkoortinneqanngitsoq.**

**Akissut:**

Naalakkersuisut oqaatigisinnaavaat Inatsisartut aalajangiiffigisassaattut siunnersuummi ukiaanerani ataatsimiinnermi immikkoortoq 106-itut suliarineqartumi naggataarutaasumik inassuteqaammi makkua allassimammata:

" Taamaattumik qulaani pineqartut tunngavigalugit uranimik atortussiassanillu qinngornilinnik allanik atuinissamik "attueqqusinnngilluinnarnerup" atorunnaarsinnissaanik Inatsisartut akuersissutigissagaat Naalakkersuisut innersuutigaa. Malittarisassiassat inissippata uranimik atortussiassanillu qinngornilinnik allanik, uranip saniatigut tunisassiassatut akuuffigisaanik atuinissamut akuersissutit nalunaarutigisarnissaannut tunngavissaqalissaaq."

Naalakkersuisut taamaalillutik uppersarsinnaanngilaat, uranip pingaarnertut imaluunniit saniatigooralugu tunisassiarineqartarnissaa Inatsisartuni aalajangiinerimi immikkoortinneqanngitsoq.

Peqatigisaanik oqaatigineqassaaq, uranimut naliusunut killissaliussat qaffasinnerpaaffissaanik nutaamik atuutsitsisoqalissasoq, Naalakkersuisut naalakkersuisooqatigiinnissamut isumaqatigiisumminni immikkoortutut ilaatitsimmata. Akuersaanngilluinnarnissap atorunnaarsinneqarnera sioqqullugu uranimut naliusunut killissaliussaq suliaqarnermi malitassatut 60 ppm-imut (parts per million) aalajangiunneqarpoq, taannalu pinngortitami nalinginnaasumik qinngorneqarnerata annertoqqatigaa. Akuersaanngilluinnarnissamik atorunnaarsitsinerimi uranip akuinut naliusunut killissaliussap nutaap, qinersiviup matuma ingerlanerani, qaffasinnerusumik aalajangersarneqarnissaa Naalakkersuisut kissaatigaa, taamaalilluni naliusunut killissaliussami, peqarfinni uranip saffiugassami piarneqartussami akulerulluni akuuffigisaanni, piiaanissaq ajornarunnaarsinneqassalluni, taamaalillunilu peqarfimmik piiaanermut atatillugu saniatigut tunisassiarineqarsinnaalissalluni. Taamaattoq peqarfimmi uraniinnavimmik

tungaveqartumik piaanissamik ajornarunnaarsitsisussamik naliusunut killissaliussap qaffasinnerusumut inissinneqarnissaa kissaatigineqanngilaq.

- 2. Naalackersuisut uppersaaqquneqarputtaa paaaffiup piunerata aallartinnerani saniatigooralugit qallorneqarsimasut, pingaarnertut qallorneqalersutut inississinnaanerit – assersuutigalugu nunani tamani niuffannermit akit allangornerit pequtaallutik.**

**Akissut:**

Tunisassiaq (aatsitassaq imaluunniit saffiugassaq) aatsitassarsiorfimmik pilersitsinnermi saniatigut tunisassiassatut isigineqartoq, nunarsuarmi niuerfimmik akigititit ineriartornerisa malitsigisaannik, tamatuma kingorna pingaarnertut tunisassiannorsinnaasoq Naalackersuisut uppersarsinnaavaat. Tamanna siusinnerusukku § 37 naapertorlugu apeqquteqaatinut pingasunut, aamma apeqquteqartup nammineerluni innersuussutigisaannut akissuteqaatini, siusinnerusukku pingasoriarluni uppersarneqartarpoq.

Kuannersuit aallaavigigaanni aatsitassarsiorfik pilersinneqassaguni, minnerpaamik ukiuni 30-imi atuussinnaasoq naatsorsuutigineqarpoq. Ukiut 30-it ingerlaneranni tunisassianut aatsitassarsiorfimmik tunisassiarineqartunut akigititit annertoorujussuarmik allangorsinnaapput, taamaattumik saniatigut tunisassiarineqaqqartup, soorlu, tamatuma kingorna pingaarnertut tunisassiatut inississinnaanera periarfissaqarpoq. Kuannersuarni peqarfik aamma Thorium-imik peqarfimmik akoqarpoq, maannakkut niuernermit tungaveqartumik soqutiginaateqanngitsumik. Qulluinnermut ullumikkut atorineqartumut taarsiullugu ataatsimoortunngortitsisarneq aallaavigalugu atomip nukinganik nukissiorfimmik ineriartortitsinissap iluani ilisimatusarneq apeqqutaalluni, aamma tunisassiaq naleqanngitsutut isigineqaqqaaraluartup, saniatigut tunisassiannorsinnaanera imaluunniit pingaarnertut tunisassiannorsinnaanera, aamma periarfissannorsinnaavoq.

Naalackersuisut isumaqanngillat aatsitassarsiorfiup ingerlanerani akigititani allanguuteqarnerit, uranip saniatigut tunisassiaaneranit pingaarnertut tunisassiannorneranik kinguneqartut, peqarfimmik piaanissamut akuersissutip ingerlaannarnissaanut sunniuteqassasut.

- 3. Naalackersuisuusimasut §37 naapertorlugu apeqqutinut akissutigisimasaat nr. 118, 176 kiisalu 207, 2013-imeersut Naalackersuisut isumaqatigivaat? Akissut naamiuppat –massakkut Naalackersuisuusut akissutigineqarsimasunut sutigit nikingappat?**

**Akissut:**

Oqaaseqarnerit § 37 naapertorlugu apeqquteqaatinut 2013-118-imut, 2013-176-imut aamma 2013-207-imut akissuteqaatini saqqummertut Naalackersuisut isumaqatigaat.

Inussiarnarsumik inuulluaqqullunga

Vittus Qujaukitsoq